

海豐縣志續編

民國二十年春

黃菊光題



文獻風土
賴之以徵

民國二十年春黃菊光題

於海豐縣立中學校



重修海豐縣誌序

粵有海邑巨海一支流耳然莫非水也靈者龍螭蠢者魚鼈紛紛然蕃育於其間誰云不足觀哉故夫名勝名物忠孝節廉文詞材藝乾隆己巳所修之誌詳哉言之矣顧百餘年前之天理卽同夫百餘年後之天理而百餘年後之人情未必盡合夫百餘年前之人情則一時有一時之事實誰能逆料於未來而預記之歟是明明以其任俟後人矣况兵燹之餘凡人之自絕於天與事之不愧於天者忍聽其日就銷沉耶辛未秋蒞斯土公餘之暇與邑紳議立重修章程設局文昌

宮舉舊誌而增益之非敢曰克體天心也而人事之傳庶如水流不息也乎是爲序

同治十有二年歲在癸酉孟夏之吉欽加同知銜知海豐縣事蔡逢恩撰

總裁同知銜海豐縣知縣加三級蔡逢恩
叅訂儒學教諭黎乾

同校典史甘鏞

編纂員外郎林光斐

高州府電白縣教諭辛亥恩科舉人馬逢蕃

叙選直隸州州判恩貢生林昞開

大挑即選教諭壬戌恩科經魁陳二南

校對叙選直隸州州判辛酉科拔貢生吳元翼

縣學廩生陳裕璋

恩貢生梁賡虞

即選訓導歲貢生何宰離

府學生員林芾南

縣學廩生林光紫

海豐縣志

序

二

歲貢生林初開

府學生員黃大椿

縣學廩生沈文

叙選訓導歲貢生林錫莪

同訂縣學增生陳其鯤

縣學廩生李可權

縣學廩生陳光耀

縣學廩生施輝山

叙選府經附貢生林錫三

府學生員陳梅修

疆域

海豐舊八都興賢石塘楊安金錫坊廓石帆吉康龍溪東抵潮陽東北抵揭陽永安北抵長樂西北至碗窰西至黃竹涌西南至小漠旺官墟南至汕尾港皆抵歸善幅員延袤五百里有奇此合縣以前之疆域也自嘉靖析龍溪置惠來雍正析坊廓石帆吉康置陸豐縣止存興賢石塘楊安金錫四都縱橫不過二百七十里而已界限所抵東至白沙四十里東北至伯公凹分水五十里東南至大德港七十里皆陸豐西至黃竹涌一百三十里西南至小漠旺官墟九十里西北至大安峒八十里南至汕尾海五十里北至棚仔嶺四十里皆歸善此分縣以後之疆域也君子觀於邑治之分而今昔形勢之殊可指數矣

山川

山自梅嶺南條南境而來越興甯至長樂之嵩螺山聯屬峯巒分一支趨潮郡南二百里起大寨徑山自漏裡東走揭陽飛泉西拆霖田大廟而南曰椴木嶂微折而特聳爲蓮花峯又南曰銀瓶又南十餘里曰五坡嶺下二里許爲縣治東走五十里逾掘龍逕而南曰激石又東曰羅峯又南一百里曰大金籠銀瓶西走五十里拆而南曰大山又南十里經大安峒而東曰小溪又南踰驢耳逕三十里曰大蹊嶺之山西折十里曰平安下爲平安驛又西十五里爲楊桃嶺逾五里沙過深涌十里曰鵝哺嶺又折二十里過黃竹涌即平政矣縣之境內東二里有龍山二十里有東保障東南十里有小金籠山西十里有西保障山南五十里有雙桂山縣學宮面之此分縣後山之形勢也

山既由北而南川亦隨山而注縣東一里爲龍津水源出銀瓶山南流至小金籠山下左合赤岸水又西南右合大小液水是爲三江赤岸去縣十里發源一自掘龍徑一自激石溪合流於青湖歧流於新濫新濫在縣東南二十五里閩廣鹽販多此泊舟上五里有鄉曰宋溪頭有嶺曰宋師嶺階級猶存蓋宋舟師於此繫濬築山因以開通水道者也縣西二十里曰小液源自

馬鞍山三十里曰大液源自小溪山合流於田心東會龍津諸水西南流至麗江浦大金籠山西入海縣西一百里曰鳳河接歸善界亦曰鳳湖北受石溪鵝嘯嶺赤石港諸水南流由小漠港入海此分縣後水之大勢也

〔山〕蓮花山（邑北五十里形如蓮花高數百丈層巒聳拔翠秀異常人擬爲九華之亞上平如砥中有七星墩其產茶氣味最佳） 銀瓶山（邑北廿五里昂伏乾坎間縣祖山也高千仞狀若瓶產五色奇花上有天池秋冬不涸春夏瀑落如練其茶樹爲雲霧所罩者味尤甘香） 大面嶺（邑西北三里許脉自銀瓶而來方員尊重脫下絡繹數墩阜平鋪一片始結束而爲縣治） 五獅凹（邑正北五里其形若獅昂伏顧盼各具天然氣勢前有一巒員淨端正俗呼爲五獅戲毬） 龍山（邑東里許迎春禱雨之處怪石嵯峨碧潭澄澈垂釣者坐於樹巖之下可避風雨） 五坡嶺（邑北里許宋文山公移屯至此方飯被執處也上有方飯亭石碑遺像下有表忠祠茂林修竹曲徑清幽吟咏憑吊者 接踵） 鹿境山（邑東南隅十里環以大河鄉村絡繹山半有甘泉人呼爲聖井） 黃旗嶺（邑北二十里蓮花山之右輔也逶迤聯續突起高峯其形如旗雲霞掩映有光彩之色焉） 謝道山（邑南十里雙

峯並峙四面繞河直通于海） 鵝埠嶺（邑西一百一十里山麓有溫泉可以滌疥） 大嶂山（邑東三十里綿互高聳爲縣治耳峯散下脈絡悠揚一望無際眞方隅之保障也） 虎山（邑東三十里盤鬱幽深茅菴梵刹聯繹山腰居民多持長素以種茶爲業恍然別有洞天） 雙桂山（邑正南五十里兩峯並峙秀蔚蒼翠爲南方諸山之冠） 捷勝山（邑東南七十里上有石井源泉甘潔又有石如船形建亭以供佛像一望海水汪洋島嶼盤錯僊客騷人登跳不絕） 燕洲山（邑西三十里其中空洞如屋昔年海氛避亂者潛隱其中可容百十人焉） 牛頭山（邑西十里許乃東南障海 之山也產牙香甚佳昔有商人謀開錫礦聚衆數十鄉民棄家逃竄鑿崩墳墓淹沒田產不計其數知縣白章申詳列憲勒石禁革此歷世所當保護者也） 羊蹄嶺（邑西七十里有關爲潮惠往來之隘口一夫扼險萬夫莫當昔林呈祥云海氛戒嚴坎寨失守豐以是嶺故得無恙由是觀之可謂西方保障矣） 沙田嶺（邑北四十餘里蜿蜒竊折雲樹蒼茫飛泉激石噴雪雷鳴蓋有三十里許焉） 烏石蓮（邑南五十餘里高四百丈有奇峯如朶蓮掃海面前九洲環列總會衆流堪稱一方形勝）

〔川〕龍津（邑東一里其源出於銀瓶漚而爲潭復達於海每值秋夜皎月當空漁歌互唱倚欄而聽者有低徊不忍去焉）南門湖（湖因縣右隨龍水斜背故買田塘開鑿爲邑明堂又疏通西方小湖入湖由高田東注龍津會合來水始議於崇正庚午落成於康熙辛未迄今正對南門員平如鏡夾湖亭榭夾映於榕青竹綠間出城望之恍如錢塘畫境）龍山潭（在龍山之下其深無際上有天后古廟每神誕時常見巨魚兩尾翻浪跳躍移時乃去蓋靈爽之所式憑）長春洞（在大面嶺之麓怪石嶙峋奇花芬馥上有天然石池寬約半畝水清見底小魚數色出沒游泳每當寒食重陽讌會者隨澗布筵爲曲水流觴之樂）幾希洞（與長春洞隔去數峯谿徑迴曲其幽深寬豁倍焉聞昔有高士隱居於此中有一石壁方正如屏雋（金旁）幾希兩字）天然洞（一名釣月磯在長春過西一峯潭不甚寬巖不甚峻而當前石壁闕作峒門中有斑紋小魚隨泉跳躍人以爲靈氣所產云）四謀谷（從天然峒過西一峯入谷頗寬經數轉而始抵峒腹幽深宏廠別出凡蹊靜坐是間真有目謀耳謀心謀神謀之致谷中有希夷巖）紅花潭（邑東北四里潭環山趾上產杜鵑春暮花開爛然映水真可謂川原遠近蒸紅霞也）瀑布灘（在龍津上流淨綠無塵就水浣衣分外鮮潔）

海豐縣誌

山川

龍湫潭（邑西十餘里時偶旱禱雨 至其地 吸其水應驗甚神常有 漁人執弓矢而射之所獲最多）鳳河（ 高山絕壁其流運小漠出大海 魚鹽之藪也）漲海（隋書地理 有漲海在縣南百里方輿紀要文天祥嘗率舟師 駐此）

險要

海豐縣治枕山面海北有平嶼之峻東有大嶂之高西有羊蹄之險南有鹿境謝道山爲水口之關鍵外則長沙后門汕尾捷勝均皆濱海扼要之處從前分設衛汛在在俱見關心夫東南隅全錫一都地廣人衆其間田壠大德扁涌遮浪東洲坑港汶紛歧盜賊出沒難測海面巡哨最爲喫緊故於油美捷勝特設文武衛汛固爲防虞計亦以航檣交集商旅往來稽察鎮撫皆不可少者也雖魚鹽之利甲於一邑而大鄉巨族强悍者多非無讀書君子思爲轉移風俗終不免有潮屬械鬪惡習傳染大嶂山在縣治之東離城二十餘里由東門外至龍津橋一里橋外鄉村環聚十里至赤岸渡溪河界隔有汛防駐紮距陸豐縣治六十里此爲衝途若后門本埠居民少所慮者海寇爲奸弁兵果營規整肅實心實力與民相聯一氣原易安堵至鵝埠曠

野平原內地居民多離縣治遠且與歸善交界前人設一分司凡遇地方有事自可就近彈壓法原美善今衙署坍塌兼商賈買賣小地方無甚出息廢墮日久爲可惜也其羊蹄嶺關雖離縣遠而外有鵝埠分司與內地居民聯絡聲援誠西路一大保障倘謂坦夷之鵝埠城不若嶺關之險而易守竊恐羊蹄左角之君子嶺（一名岐嶺）與歸善之小漠港相望咫尺亦足爲內地之處者向於嶺外平坦靠水之處設一觀音塘汎以嚴稽查良有深意存焉至北路平嶼以下多山居小村獨公平墟與西坑爲大論永安及嘉應之長樂雖在海豐之北地本不相界連而咸豐六年賊出南嶺則由陸豐之新田竄入同治四年康逆肆擾嘉應長樂時紳士奉諭雇勇防守佛子凹等處一則恐由河婆分竄一則恐由南嶺分竄論理由潮之河婆入寇勢必過陸豐之坪門徑則於平嶼之佛子凹爲近由永安之南嶺入寇勢必越陸豐之新田則於平嶼之龍鬚徑爲近又有由南嶺小路過白藤嶂勢必紆道於歸善之高潭而入則守西坑與黃羌屯要之山路崎嶇所與陸豐交界地方當以佛子凹龍鬚徑二處爲險要

海豐縣誌

山川

四

風俗

風俗

惠郡如洙沂昔致稱於蘇子海豐循詩禮今見許於鹿洲邑枕山面海北路之人依山爲業獨存古風南路之人望海爲田亦循真性西路膏腴沃壤耕夫識字負來者亦橫經惟東路逼近潮州人多強悍讀書者較少

舊郡志稱龍川多尙紗羅綾絹海豐惟年節慶賀一服餘盡布衣今不異古所云猶見先民樸素

宋歐陽直卿有言河源餘菽麥令輸送而海豐瘠土聽計直而輸之是豐在宋固所謂瘠土民貧也茲攷邑乘志楊安曰熟足三都志金錫曰田園饒裕今與昔異矣特未知邪僻之誘寡而嗜欲之情輕者同焉否也

士無曠學自勝衣擲管即使劬書農但力田凡種蒔薯每隨刈稻工無奇技所造器物必在樸素渾堅商不遠遊多從近地廢居挾貲販蘇杭者蓋寡

惟婦人多尙銀髮髻比吹螺而短重五六兩以銀爲之欲戴卷髮成團加諸頭上環插步搖簪導統計須數十金其欲嫁者尤繁首飾富者三二百兩多盛漆盒炫燿路人中者亦六斤五斤

以爲臉面故貧戶難之溺女半由於此雖張前令經禁而難戢此風亟祈良有司有以力挽也
婦女又嗜鹹茶茶少下鹽置瓦盆中播之千百杵令成膏液然後沃以沸水下以炒麻家常加
此二餐於早午飯後若親串至又增多花生炒米浮滿茶甌昔粵中之款客無檳榔必相嫌今
豐之謙賓少鹹茶不成事矣

歲時

元旦黎明禮神謁祖燒爆竹茹福齋主賓交賀相往來至初五日方止以後輪請年酒尙有古
傳坐飲遺風自甲寅亂後人貧此事已廢

立春有司送勾芒土牛勾芒名拗春童不帽春寒着帽春煖土牛多水則黑多旱則紅野老見
以占年亦猶田家無五行雨旱卜蛙聲之意

上元觀燈婦女出遊者必取碗以爲婆爐縞袂聯翩魚貫縣衙名目看阿奶又有迎紫姑之戲
兩人擎厚念咒以能自動者爲神來其文士則造爲隱語書貼燈棚任人尋思有如射覆名曰
打猜

十九日俗傳天穿節人家各煎糕餅名補天穿此風自唐已然李青蓮有一枚煎餅補天穿之
句

二月春社鄉民入廟祈穀醮錢買謙家家飲福扶醉而歸庶幾古之蜡祭

寒食俗不禁火清明有事祖先烝嘗多者始祖傳下無不徧祭祭則置楮於墓紅白滿山曰掛
帛新家必諧年數始祭繫錢松節插於穴上曰開青

四月初八爲釋迦誕雖不入庵作會而截米粉成糝條煮以私祝無戶無之惟讀書人間有立異者

五月端午郡志謂龍舟競渡歸善費用甚多海豐無此今海豐甚於歸善自端陽後無處不設標奪幟歸無鄉不演戲矣

六月初六正午赫曦俗稱曝銀之日儒家者流本無家珍惟出架上藏書向陽一晒阮咸云未能免俗聊復爾爾也

七夕女子向空穿鍼置花水於盆以乞巧

中元夕釋子爲盂蘭會以食不祀亡魂俗必預先以楮衣酒醴祭其祖禰翼日仍以茶果供焉中秋賞月啗餅剝芋老少聚飲于家社廟中又有弄繖鬪歌徹夜遊行以爲樂

九月兒童多放紙鳶其能鳴者名響弓鶴迨重陽登高坡嶺附城畢集風箏之韻上徹雲霄軍興以來無復從前景致

冬至祠祭自初祖至少宗皆有祀事而主鬯非宗子不行臘月二十四號小年節祀竈焚紙馬以送神俗謂諸神朝天預於此日

除夕更春之祀祖先大小圍爐團欒(口外)坐飲至更闌不睡曰守歲續油於盞曰添燈夜旣深各家放爆啟門曰開門炮

物產

穀品

黏（有赤黏白黏遲黏埔黏而黃黏即占城尖頭米邑最盛莫如交趾黏異物志稱一歲再種者土民賴之以爲天）糯（有安南糯高州糯赤脚糯黃糯白糯早糯埔糯而烏壳糯尤佳）
一 秔（有白秔赤秔而香秔一種惟鵝哺種之一撮和炊米皆香美）
按豐高田所種早季亦有快遲快者小暑前收遲者處暑後收皆清明下秧者也冬季亦有快遲快者重陽前收遲者立冬後收皆芒種下種者也冬季快種收後即種麥至蠟半即收腴田所以一年三熟惟潮田四月種十月收僅一熟耳

麥品

麥（有大小二樣去年早冬稻蓄皆無賴此稍救月餘之苦）蕎麥御麥（舊名蕎麥泌園等處種之極多）

豆品

豆（黑黃二種出大坑各鄉赤白綠三種公平爲盛）扁豆（俗名雪豆白露後實更繁田畔池邊無不架竹以植）豇豆（俗名豆角）河嘯豆（出外洋初惟省西關一老圃得種法今則徧處皆栽梅隴一方尤盛）地豆（舊志但云近有參豆今百餘年惟西南無多東北則無人不植冬成熟子可榨油渣可墮物獲利不止千金此物與蔗豐產大宗也）

麻品

脂麻（土產者粒大膏多）大麻（細者可績粗者祇剝爲繩）

黍品

黍（有膏梁鴨脚黍名目）稷（莖葉似梁而卑粒如梁而扁多種高埔即北邊小米又有盜種海墘濕地生不勞人力者別是一種）

薯品

薯（俗呼米粘以充歲歉豐賴以爲多戶數十人僅煮撮米家常飯舍此不能也但畏鹽霜一凍根藤皆死）豬肝薯（野人籬落多有）樹薯（結少味劣故種者寥寥）

芋品

芋（有旱芋黃芋旱芋水芋紅芽芋呂祖謙謂惠有此物故豐種特多）

瓜品

瓜（有王瓜金瓜西瓜香瓜絲瓜冬瓜番瓜竹瓜苦瓜匏葫蘆瓜等名）

蔬品

蕪（出南坳者佳）薑（至美者金錫產）芥藍（汕尾後寮出者脆美）芥（雜記稱豐芥重二十餘斤葉圓厚無齒他處無之）茭 茄（有青紫白三種）蕪（草上）筒蒿 蒿菘 蘆蒿（太平時公平歲可晒千萬斤菜乾船裝往者今則少矣）金針 茨姑 赤菜 紫菜（捷勝甚多）海毛菜（上三菜府志稱惟海豐有之海毛產猴跳石海中可熬爲膏土人名猴毛膏至美）瓊枝（即石花）鷄脚菜（俗名蠔菜）菩提菜（雜記稱海豐所產即海苔）海粉（海邊蟲食海菜之糞要綠色清脆者佳）

果品

荔（有荔枝龍荔二種）龍眼（有龍眼虎眼二種）蜜望果（臺灣紀畧曰美（木旁）肇慶志曰莽今依粵東筆記）番石榴（紀畧作及仔與羨（木旁）皆不見字書邑產極衆）楊梅

海豐縣誌

物產

八

羊桃（亦名三廉）佛手柑 王梨（俗名波蘿）黃皮（土諺云飢食荔枝飽食黃皮）

宜濛（俗曰宜母元吳棻有宜濛子解渴水歌）人面子（南山甚繁）餘甘 橄欖 烏欖（虎山多取肉醃菹名欖鼓）秋風子（俗名鳥梨）香櫟 波蘿蜜 錐子 榛子 櫓罌子（破其瓣食之微甘）倒捻子（子如軟棉而小外紫內赤無核頭上有四葉如蒂食必捻蒂故名山陂七月中皆熟牧人飽食之）必納子 崑崙蔗 竹蔗（前止公平處種多今則出城東里許盡是每歲榨糖可得數千金穀麥豆地豆之外厥利爲多）

木品

松栢 榕 樟 桂 樟 楓 桐 刺桐 荏桐（子可爲油）樺（一名西河柳）欖 蒲葵 木棉 女貞 烏柏 貝多 黃楊 鐵樹 相思樹 慎火樹

竹品

竹（有筋竹筍竹刺竹苦竹金竹桂竹石竹麻竹觀音竹大頭竹人面竹撐篙竺樓閣竺等名）

花品

蘭（有劍蘭朱蘭蒼蘭風蘭而樹蘭爲尤盛五葉勝于三葉花不落久尙能香）眞珠蘭（比

鷄爪蘭香更佳）桂 木樨 蠟梅 夾竹桃 萱棉花 紫微 瑞香 仙礬（一名七里香）佛桑 錦堂春 菊花 紫荊 鷄冠 醉芙蓉 山茶 木槿 水仙 含笑（南山至多二月盛開香風撲鼻）紅鵲（長春洞紅花潭當春仲時烘山照水）鷹爪（有瓣兩臺花形似之）凌霄 玉簪 海棠（有垂絲西府日本各種）繡毯 丁香 余縻（西旁）月季 麗春 薔薇 罌粟 末利（草上）素馨 鳳仙 蛱蝶 頰桐（一名船髻花俗稱龍船花）紫藤 金雀 藤脂 雪瓣 金鳳（葉類槐花黃形如鳳心吐黃綠邑中特盛）金錢 夜合 長春 碎玉葵 一丈紅 美人蕉 上元紅 七姊妹 剪春蘿（又有剪絨剪秋紗）百子蓮 西番蓮 鐵線蓮 棠棣 脫衣換錦（一名金縷又名無義草）

草品

丁公藤（土名鷄屎藤）黃藤 忍冬藤 木鼈子藤 白花藤 瓠鞞藤 龍鱗草 虎耳書帶 吉祥 鐘草 鹹草（生淺港中林厝寮一派皆織蓆）斷腸（一名思子蔓賢令尹嘗購人除之終不能絕）亡佛耳（一名茸母其綿和米粉可茹）顛茄 海芋 番椒 龍葵 酢漿 破銅錢 箸田字草 牛尾溫（草上）藤荔（其液有膏沃以糖霜食之可口）

海豐縣誌

物產

藥品

香附 蒼耳 益母 金櫻子 縮砂仁 地骨皮 天名精 金剛刺 黃蜀葵 虎刺 芣苢 天冬 史君子 黑牽牛 土茯苓 草決明 杜膽頭 水楊梅 紫蘇 蓖麻 菖蒲 何首烏 葉下紅 蒲公英 火炭母 五爪龍 透骨草 麥冬 梔子 枸杞 甘菊 陳皮 石斛 穀精 薄荷 木通 茴香 括蘆 餘糧 荖 畢及 桑寄生 山薑 桑白皮 黃精 巴豆 金銀花 三賴

布品

綿布 苧布（經緯密者名土經）葛布 蕉布 麻布

羽品

山鷄 竹鷄 水鶴 鷹 鷓 山鵲 畫眉（聲圓善鬪）鷓鴣 金鴨（即鷓俗飼以粟相賭以銀亂後稍戢）鳩 水鴨 水丕（鳥旁）禾穀 鵝 青粧 白鴿 巧婦 相思 秦吉了 雁 翡翠 睪谷（鳥旁）

毛品

蟲品

蜜蜂（邑多養能採花釀蜜）蜂（有黃蜂米碎雷即赤蜂而赤者大如指頭尤毒）田雞
蛇（以青竹標箠箕筭鳥肉為極毒）白蟻（地濕極多新構房不數月亦有食壞者雜記記
藩庫交盤銀少十式兩洞腹陷邊皆蟻據為穴）竈馬（一名竈鷄）金蟬（與他處蟬異）
蠖（生花葉背）蠅（即蠅虎）蠶（能化蛭）蚊 蟻蒙 蚰蜒 蛭馬蚊（觸之
側臥如環）蝮蛇 伊威 吉蟻 螞蟻 壁錢 蛞蝓 草龍（如小蛇四足見人則走）
水馬 沙嘴（揉去涎和味煮極腴）禾蟲（形如百足長寸餘青黃相間中有白漿滴以醋
鹽自出漉以蒸卵佳鄉亦有為鮓者）惡蠅 龍眼雞（羽兩重外重五綵亦榜鷄等類）

料品

鹽（東冲鹽町頭者白如雪）糖（通邑製賣年可萬金）麩（米粉雜草藥為之稀合謂飲後
頭涿涿然邑有藏多年者火氣已除亦稱佳釀）香粉（南峯一派水碓所春可為香）茶（銀
瓶蓮花穀雨前採芽製者上人曰本山味埒龍井販之外省亦號上珍但偽者頗多士人尙不
能辨）錠（后門各處種青土窖醃之久則成錠可染衣）蠟（俗多蜜蜂取蜜之滓則成蠟）

海豐縣誌

物產

沿革

沿革

邑於唐虞在揚州外荒而劉昭註漢書已謂南海古有羅山浮博於羅故置縣是博羅之名亦
久矣周武王正九服徹法定南海為藩服貢而不稅至戰國則屬之揚越焉秦始皇三十三年
畧取陸梁地用任囂尉南海而博羅龍川屬之舊郡志謂二縣始於秦是也東晉咸和陸年析
博羅置海豐邑之名所由昉唐高祖武德五年又析海豐置安陸僅數年即省入焉雖析猶未
析豐固依然也明皇天寶元年郡改海豐邑仍隸之南漢初徙循州置龍川縣以歸善海豐博
羅河源屬焉但統之而已明正德末施儒平新田寇諸設惠來迨嘉靖三年始析龍溪都六圖
合潮陽惠來等都立惠來縣清雍正九年又析坊廓石帆吉康三都置陸豐邑至是經二析矣
地既狹則無鞭長不及之虞政不煩復免絲棼難治之慮遂使最爾小邑可比中都土宇販章
視昔孔厚蓋善後之計歷久彌長也（謹按葉春及集海豐為邑始於東晉之季與通志府
志同前令于卜熊修志序獨云置邑自漢始舊志謂晉明帝陸年改隸東官殆未之攷不知何
據或從蔡方炳增廣輿記海豐漢東官地悞之耶）

建置

〔城〕 坎下寨城（崇正拾年建週圍寬叁百捌拾伍丈柒尺高壹丈柒尺馬路捌尺伍寸堞口叁百玖拾壹個東南門城樓式座配防砲柒拾捌位距礮石壹百叁拾里距捷勝叁拾里）捷勝所城（在縣南捌拾里洪武式拾捌年千戶侯良始建週圍肆百柒拾式丈高壹丈伍尺馬路壹丈式尺堞口肆百肆拾個城樓肆座北門無月城配防砲壹拾柒位道光式拾陸年自汕美移砲壹位小銅鎖砲壹位共壹拾玖位距礮石壹百壹拾里署有前後堂鎮撫司吏日廳旗幟廟軍器局萬歷拾式年千戶汪如圭重建）

〔砲臺〕 遮浪砲臺（康熙伍拾陸年建週圍肆拾壹丈高壹丈伍尺堞口叁拾陸個營房捌間配防砲捌位距礮石一百三十里距捷勝叁拾里） 汕美砲臺（嘉慶貳年督同紳士王維忠等建造週圍肆拾肆丈壹尺高壹丈叁尺無堞口營房拾間配防砲陸位上堆寄貯砲陸位距礮石壹百肆拾里距捷勝叁拾里） 南山砲臺（後裁砲八位移在汕美砲臺） 長沙砲臺（嘉慶玖年創造民建週圍肆拾捌丈高壹丈陸尺弁署壹間兵房拾間配防砲拾位

距礮石壹百柒拾里距捷勝伍拾里） 后門砲台（乾隆五十九年建道光十四年紳士林光佩修週圍四十三丈高一丈五尺無堞口營房十三間配防砲七位距礮石二百里距捷勝九十里） 謝道山砲台（嘉慶十五年建週圍二十七丈高七尺堞口三十個兵房伍間配防砲伍位距礮石一百四十里距捷勝八十里） 巔關汎防（乾隆伍年建高一丈四尺東關一十一丈西關一十三丈四尺配防砲伍位距礮石一百九十里距捷勝一百里）

〔樓〕 望樓（在縣治後前令周一敬修而擴之） 奎樓（一在麗江試院一在梅隴墟一在汕尾埠內一在捷勝所城南門內）

〔亭〕 方飯亭（在五坡祠後前令張濟時所建中有宋文丞相石刻像甘公亮記久圯雍正八年前令王者輔重建） 觀稼亭（在龍山今廢） 問津亭（在龍山今廢） 息肩亭（在羊蹠嶺郡守林國相學道林佳鼎增建佛菴後圯康熙十年糧道徐養仁前令范逢春建觀音閣關帝祠今改設關隘移建于羊蹠西麓）

〔閣〕 尊經閣（在學宮大殿後雍正十一年前令林寅儒學張承瀨李祖錕典史王澄暨闔邑紳士同建） 文昌閣（一即在尊經閣一在捷勝所城南門內）

(橋) 東門橋 (在縣東門外) 西門橋 (在縣西門外名永濟) 北門橋 (在縣北門外) 龍津橋 (在縣東一里明天順七年前令胡廣修萬歷四十四年橋燬邑人姚恭蘇吳志高架木以渡崇正十一年復燬前令李炫重造翼以石欄首尾立坊刻示其上禁民搭篷舖以防火災後又燬壞東橋坊萬歷四十六年監生林承炫生員林承薦早稱故父黔縣知縣林股捐銀二百四十兩砌築龍津橋東西畔濕地以便往來前令陳公酌稅銀二兩四錢給照付文起蓋篷舖賃人貿易東西篷舖三十六間計稅銀三十餘兩捐爲科舉祭魁之用酌餘多寡充給應試盤費申詳府道提學蔡批如議舖稅准捐助科舉生員盤費卷資及祭魁之用擇諸生之有行者掌之勒石永爲規制後東畔市葉大車移于新市昔年議補稅銀及魚市已廢此項久無可補矣) 赤岸橋 (在縣東十里嘉靖中水衝圯後設官渡于上流) 羅山橋 (在縣東二十里指揮使劉國勳建) 長舖橋 (在縣東四十里嘉靖三十五年訓導林鳳儀重建) 黃坭坎橋 (在縣西五里崇正十一年貢生吳昌祚重建) 小液橋 (在縣西二十里宋紹興肆年前令陳震建) 大液橋 (在縣西叁拾里萬歷間前令葉維榮建後圯改爲渡道光叁拾年同知銜林格置租式拾肆石以食渡夫令成義渡往來便之) 王化塘

橋 (名達康橋 在縣西肆拾里道光式拾叁年同知銜林格建) 平安塘橋 (名永康橋 在縣西陸拾里道光式拾壹年同知銜林格建) 羊躡嶺橋 (名五康橋 在縣西七十里平安塘至此橋梁大小五處道光二十五年均係同知銜林格建前令朱慶棠子名曰五康橋) 淺沙橋 (名安康橋 在縣西六十里道光十三年同知銜林格建) 慶康橋 (在縣西肆十里道光十二年同知銜林格建) 石碑橋 (名安石橋 在縣西三十五里嘉慶己卯年監生蕭克茂建其裔孫監生蕭學橋修) 南津橋 (在縣東七十里乾隆辛未年監生吳玉珍建辛卯年其男若觀修) 石坂頭橋 (名履安橋 在縣西七十里道光三年葉慕曾建) 留香橋 (在縣西肆十里乾隆式十肆年耆民賴秀煌建) 北鬱橋 (在縣西南式十里邑人陳燕樓建一名雷公橋 又改名萬年橋) 永安橋 (在縣東北十里嘉靖三十肆年訓導林鳳儀建) 梨木橋 (在縣東北十里嘉靖二十四年訓導林鳳儀建) 高橋 (一在厦巷口一在東城外東南角) 水巷橋 (在縣城北門外接東城朝龍門) 新市橋 (通龍津橋水環縣城入南門湖) 梅隴橋 (即安步橋順治 年徐集所建生員徐天覺修後圯乾隆十式年生員徐德子民徐秉崑秉麟秉彝重建) 沙埔橋 (即迪康橋在縣西四十里嘉

慶式拾四年太學生林善建子衛分府林模等於道光二十一年修後大水冲圮同治陸年縣生員林光檄等重建） 滙津橋（在邑西四十餘里梅隴墟東跡肇自宋宣和二年太學生林善乾隆拾貳年重建子衛千總林模等嘉慶式拾貳年修孫參將銜光佩等同治二年重修） 龜山橋（離縣東五十餘里） 埔心橋（離縣西百餘里） 新村橋（離縣西七十里） 水貝橋（離縣西百餘里） 通津橋（離縣東肆拾里） 鹿境（在縣南拾里） 流涌（在縣東南肆拾里） 赤岸（在縣東拾里正德拾貳年建） 鳳河（在縣西一百里同知銜林格亦置租式拾陸石造船僱役以濟行人） 雙溪口（在縣西三十里該渡之設已久前皆舊墟村民撐載光緒二年邑令李青培諭令勸設官渡而該鄉耆以渡靠近伊鄉耕種者多早晚全藉渡濟倘由官僱工撐擺萬一不得其人難免受其留難闔鄉安商善法見官諭往勸紳士內有廩生林光紫因紫父州同林格上年偶過此渡以雨後水急一夫難撐欲設爲義渡所以該鄉人勉遵官意又慕格平日好義情願捐租式拾捌石將該渡岸頭立爲義渡惟是此渡不獨本縣人所往來乃惠潮嘉必由之路每逢春夏水漲務須加船撐擺庶無險阻然費用浩繁紫兄光照光輝

海豐縣誌

建置

古

仰體父志將祀產抽出田租叁拾二石共湊六十石爲渡佃工食完糧修船等費過渡不用給錢早縣勒碑行人使之）

〔關〕 安集關（在縣東門外） 雄鎮關（在龍津橋東有橋東雄鎮四字） 保民關（在縣西門外） 悅物關（在永濟橋頭） 羊躡嶺關（在縣西七十里乾隆二年總督鄂奉羊躡嶺險要之地應設東西兩關乾隆五年前令李光華奉建并營房二十三間關內設砲捌座撥把總一員兵伍十名）

〔街柵〕 城中柵（乾隆十二年春始爲設法豎木立柵共一十捌處以肅夜禁也） 〔墟市〕 高田市 橋頭市 公平墟 可塘墟 水亭後市 杜塘墟 梅隴墟 赤石墟 青草墟 捷勝所市 青坑墟 田墩墟 竹圍墟 南塗墟 後徑墟 羊牯埔墟 釣橋墟 竹苞墟

〔壇廟〕 社稷壇（在邑西郊） 山川壇（在邑東郊） 先農廟（在邑東郊雍正五年春建一座三間左右廂房二壇田四畝九分有耕牛農具） 風神廟（在楊安都雍正十三年總督鄂請建勅封宣仁昭泰風伯之神懸匾曰濟和時若） 關帝廟（一在邑西門內一